

das sy vff yrem hantwerge das cleyne gefeß tögelich ausrichten, machenn, feyl habenn vff dem marckt sollen am dynstage wochenlich, szo das mann bey yn fynde vnd nicht gebroch leyden noch habenn endorffe(?).³⁾ Dorvmb szo sy das haldenn werdenn, sollenn dy fremden botticher ir gefheß bey vnns vorder nicht wen am sonnabend auch wochentlichenn zcu marckte brengenn vnd feyl habenn. Allir oben geschriebener stock puncte vnd artickel dyser ynnunge vnd wykôr behaldenn wyr vor vns vnd vor eynen iczlichenn zcukonfftigen rath der zcu verbessern⁴⁾ fur vns selber, vnd wanne wyr ader vnser nochkommenden dyßenn ynnungs briff von dem obgenanten hantwerge furderenn vnd heyschenn werdenn, sollenn vnd wollenn denn gehorßamicklich an wyderrede ynn denn rath legen, wy ofte ader wenn des noth seynn wurde, vnd sich also gantz noch altherkommen gewonheyt nach dem rathe richtenn vnd haldenn. Solche oben geschriebene wykôr vnd ynnung habenn wyr obgenanten burgermeyster vnd rathmanne myt wyßenn gunst wolwort vnd geheyße alt sessenn gemeyne vnd hantwercker dem genanten hantwerge der bottenner gegebenn vnd gebenn in dy mit vnd yn dy crafft dyses briffes vngeferlichenn. Des zcu warer orkunde habenn wyr obgenanten burgermeyster vnd rathmanne vnser der stat Pirne groß insigil vndenn an dyßem bryff myt wyßenn laßenn hangenn. Gegebenn nach Christi vnnsers herren gebort vierzehenndert dornoch ynn newn vnd sechzigestenn iarenn ann dem freytagen noch Aller heyligenn tage.

Nach einer Abschrift aus dem Ende des 15. oder Anfang des 16. Jahrhunderts im K. Haupt-Staatsarchiv zu Dresden.

3) Cop. bedorffen. 4) Cop. verbesserung.

No. 162. 1470. 29. Dec.

Der Rath zu Pirna ersucht Kurf. Ernst und Herz. Albrecht um Bestätigung des neugewählten Rathes.

Irluchtenn hochgebornen fursten. Vnnsere vndirtenige willige dinste uweren furstlichen gnoden alleczit bereit. Gnedigen lieben heren. Wir haben uff hute sonnabend nach altherkomen gewonheyt eynen nuwen burgermeister vnd rath uff vnser hochste eyde gekoren, bie namen Niclaus Noeißil zu eynem burgermeister, Gregor Kucheler, Jacuff Czappe, Mertin Schuster, Hanns Kappe, Paul Kippenhayn, Clemens Goiltsmidt, Johans Vlhorn, Hanns Bockel, Caspar Sneider, Bartusch Missenner, Andrews Schulte zu ratmanne. Hirumb uwer furstlichenn gnoden wir demutlichen bitten, vnns den gnedichenn zubestetigenn; das wollenn wir vmb uwer gnodenn in allem gehorsame alleczit vnd sunderlich mit willen gerne verdynenn. Geschrieben vnder vnnsirem der statt secrett ame sonnabende nach Innocentum 2c. LXX primo.

Vwer gnodenn vnderdenige
der rath zu Pirne.

Nach dem Orig. im K. Haupt-Staatsarchiv zu Dresden.